

Հարգելի մասնակիցներ,

Ուրախ եմ ձեզ ողջունելու «Կրթության ժամանակակից հիմնախնդիրները» խորագրով երիտասարդ գիտնականների ամառային դպրոցի մեկնարկի առիթով:

Հատկանշական է, որ նման թեմայով միջոցառում է կազմակերպվել, և ողջունելի է, որ կազմակերպողը մանկավարժության ոլորտի առաջատար բուն է՝ Խ. Աբովյանի անվան հայկական պետական մանկավարժական համալսարանը:

Գլոբալիզացիան, բոլոնյան գործընթացին ինտեգրվելը, սոցիալ-քաղաքական իրավիճակը, շարունակական և ողջ կյանքում սովորելու անհրաժեշտության ըմբռնումը նոր մարտահրավերներ են առաջադրում բարձրագույն կրթության, մասնավորապես՝ մանկավարժական կրթության համակարգին:

Այսօր, ինչպես ողջ աշխարհում, այնպես էլ Հայաստանի Հանրապետությունում խիստ կարևորվում են կրթության ոլորտի զարգացմանն ուղղված միջոցառումները:

Հենց դա է պատճառը, որ ՀՀ կառավարության 2010թ. մայիսի 27-ի նիստի N 20 արձանագրային որոշմամբ հաստատված գիտության զարգացման ռազմավարության մեջ գիտության ոլորտում առկա խնդիրների առաջնահերթ լուծումների շարքում նշվել է կրթության, գիտության, տեխնոլոգիայի և ինովացիայի ներդաշնակ փոխկապակցված համակարգի ձևավորման հարցը՝ կրթությունը մրցունակ և հրապուրիչ դարձնելու, գիտության վերարտադրությունը և տնտեսության կայուն զարգացումն ապահովելու համար:

Իր հերթին ՀՀ ԿԳՆ գիտության պետական կոմիտեն խիստ կարևորում է ոլորտի համակարգաստեղծ նշանակությունը և պատրաստակամություն է հայտնում պետական բյուջեի սահմաններում իր աջակցությունը ցուցաբերել նմանատիպ միջոցառումներին:

Ընդհանրապես, այսօրինակ միջոցառումները միտված են նաև գիտության և կրթության փոխշահավետ համագործակցությունը խրախուսելուն և մասնագիտական բազմապրոֆիլ հարթակ ստեղծելուն: Դրանք հնարավորություն են տալիս երիտասարդ գիտաշխատողներին ներկայացնել իրենց կողմից իրականացվող և հետաքրքրություն ներկայացնող հետազոտությունների արդյունքները, ոլորտի ներկայացուցիչներին

ներկայացնել իրենց գործունեությանն առնչվող խնդիրները: Եվ մենք այստեղ ենք, որպեսզի լսենք այդ խնդիրները, դրանց լուծմանն ուղղված ձեր մտտեցումները, առաջարկությունները:

Մենք կարևորում ենք այս միջոցառումը նաև նրանով, որ այն պետք է խթան հանդիսանա կրթության և գիտության ոլորտների համագործակցության և ինտեգրման համար: Ակնկալվում է, որ այս օրերի համատեղ աշխատանքի արդյունքում այդ փոխհամագործակցությունը կակտիվանա:

Եթե այլ երկրներ ձգտում են արդյունահանել իրենց ընդերքի հարստությունը, ապա մենք ստիպված ենք պեղել մեր տաղանդները, ապավինել մեր ուղեղներին: Հայաստանի բարեկեցությունը մենք պետք է կառուցենք ստեղծագործական աշխատանքով, քանի որ օգտակար հանածոների պաշարները մի օր վերջանում են, մինչդեռ մարդու ստեղծագործական ունակությունները գործնականում ուղղակի անսահմանափակ են: Եվ այս ամենի հիմքում, անշուշտ, դրված են կրթության ժամանակակից հիմնախնդիրները:

Ավարտելով խոսքս, ուզում եմ կրկին ընդգծել, որ առանց մտավոր ներուժի աճի, որը պայմանավորված է կրթության և գիտության զարգացմամբ, չի հաջողվի լուծել սոցիալ-տնտեսական բարդ խնդիրներ, հասնել քաղաքացիական համաձայնության, կառուցել զարգացած ժողովրդավարական հասարակություն:

Հարգելի մասնակիցներ,

Մեկ անգամ ևս ողջունում եմ բոլորիս ամառային դպրոցի բացման կապակցությամբ և մաղթում արդյունավետ և հաճելի աշխատանքային օրեր:

***ՀՀ կրթության և գիտության նախարարության  
գիտության պետական կոմիտեի նախագահ՝***

***Մամվել Հարությունյան***